

17. mars 1977.

229

Nr. 148.

REGLUGERÐ

um happdrættislán rikissjóðs 1977, Skuldabréf J, vegna Norður- og Austurvegar.

1. gr.

Fjármálaráðherra, f. h. rikissjóðs, gefur út til sölu innanlands happdrættis-skuldabréf, samtals að fjárhæð 250 millj. króna, skv. heimild í LII. lið 6. gr. fjárlaga 1977, sbr. lög nr. 36 frá 23. maí 1975 og lög nr. 7/1974.

2. gr.

Happdrættisskuldabréf, skv. reglugerð þessari skulu nefnd Skuldabréf J.

Þau skulu gefin út til handhafa. Verðgildi hvers skuldabréfs er 2500.00 krónur og eru þau í töluröð. Skuldabréfin skulu seld á nafnverði. Sala þeirra hefst í apríl 1977 og henni lýkur fyrir fyrsta útdráttardag, sem er 15. júní 1977.

Happdrættisskuldabréfin falla í gjalddaga eftir 10 ár eða hinn 1. apríl 1987.

Á happdrættisskuldabréfunum skal tilgreindur árlegur útdráttardagur, tala vinninga og fjárhæð þeirra hvers um sig.

3. gr.

Við innlausn happdrættisskuldabréfs greiðir rikissjóður verðbætur á höfuðstól bréfsins í hlutfalli við þá hækkun, er kann að verða á lánstímanum á þeirri vísitölu framfærslukostnaðar, sem í gildi er í apríl 1977, til gjalddaga hinn 1. apríl 1987. Miðað er við skráningu Hagstofu Íslands á vísitölu framfærslukostnaðar. Kauplags-nefnd reiknar vísitölu framfærslukostnaðar, og eru núgildandi lög um hana nr. 70 frá 29. nóv. 1967, sbr. lög nr. 1 frá 30. janúar 1959. Happdrættisskuldabréfin skulu innleyst á nafnverði, þótt vísitala framfærslukostnaðar hafi á tímabilinu til gjalddaga þeirra verið lægri en hún var í apríl 1977 og sé lægri á gjalddaga þeirra. Happdrættisskuldabréfin verða ekki innleyst að hluta.

4. gr.

Rísi ágreiningur um framkvæmd ákvæða 3. gr. um greiðslu verðbóta á höfuðstól happdrættisskuldabréfanna, skal þá vísa málinu til nefndar þeirrar, sem um er fjallað í 8. gr. laga nr. 71 frá 6. maí 1966 en hana skipa: Hagstofustjóri og er hann formaður, maður nefndur af Hæstarétti og annar nefndur af Seðlabankanum. Sama gildir, ef breyting verður á grundvelli vísitölu framfærslukostnaðar, og skal þá nefndin úrskurða, hvernig umreikna skuli á milli hinna tveggja vísitölugrundvalla. Úrskurðir nefndar þessarar eru fullnaðarúrskurðir.

5. gr.

Af happdrættisskuldabréfunum eru ekki greiddir vextir en vinningum úthlutað í samræmi við útdrátt númera, sbr. 6. gr.

6. gr.

Árleg fjárhæð vinninga í þessum flokki happdrættisláns ríkissjóðs skal nema 10% — tíu af hundraði — af heildarfjárhæð skuldabréfa flokksins og skal dregið um þá einu sinni á ári, í fyrsta sinn miðvikudaginn 15. júní 1977 og síðan 15. júní ár hvert þar á eftir, þar til dregið hefur verið samtals 10 sinnum. Síðasti dráttardagur er því 15. júní árið 1986.

Vinningum skal úthlutað skv. skrá þeirri, sem hér fer á eftir:

5 vinningar á kr.	1 000 000	=	5 000 000
5 vinningar á kr.	500 000	=	2 500 000
100 vinningar á kr.	100 000	=	10 000 000
750 vinningar á kr.	10 000	=	7 500 000
860 vinningar		kr.	25 000 000

Vinningaskrár skulu birtar í Lögbirtingablaðinu sem fyrst eftir dráttardag, auk þess sem vinningaskrár skulu liggja frammi á sölustöðum.

Notarius publicus í Reykjavík annast útdrátt vinninga að viðstöddum fulltrúa fjármálaráðuneytisins og fulltrúa Seðlabanka Íslands.

Heimilt er að nota tölvu Reiknistofnunar Háskólans við útdrátt vinninga skv. reglum nr. 27 frá 14. janúar 1977, um útdrátt vinninga í happdrættislánum ríkissjóðs, útgefnum árið 1972 og síðar vegna fjáröflunar til vegagerðar.

7. gr.

Happdrættisskuldabréfin eru undanþegin framtalsskyldu og eignarsköttum, en vinningar svo og verðbætur undanþegnar tekjuskatti og tekjuútsvari, sbr. 4. gr. laga nr. 36/1975, sbr. og lög nr. 7/1974 og lög nr. 99/1971.

8. gr.

Innlausn happdrættisskuldabréfa og greiðsla vinninga fer fram í Seðlabanka Íslands, Reykjavík.

Handhafar skuldabréfa, sem hlotið hafa vinning eða við innlausn eftir 10 ár, geta snúið sér til allra banka, bankaútibúa eða sparisjóða og afhent þeim skuldabréf gegn sérstakri kvittun. Viðkomandi banki, bankaútibú eða sparisjóður sér síðan um að fá greiðslu úr hendi útgefanda með því að senda Seðlabankanum skuldabréfið til fyrirgreiðslu.

Eftir gjalddaga greiðast engar verðbætur vegna hækkunar vísitölu framfærslukostnaðar.

Skuldabréf þessi fýrnast á 10 árum frá gjalddaga og verða ekki innleyst að þeim tíma liðnum.

Falli happdrættisvinningur á skuldabréf, skal hans vitjað innan fjögurra ára frá útdrætti ella verður hann eign ríkissjóðs.

Sé gölluðum eða rifnum skuldabréfum framvísað til greiðslu vinnings eða innlausnar með þeim hætti, að bæði númer sjáist og meira en helmingur bréfsins fylgi, fer innlausn fram að fullu, en sjáist aðeins annað númerið, verður innlausn eða greiðsla vinnings innt af hendi að hálfu, enda sé meira en fjórðungi bréfsins framvísað.

9. gr.

Reglur XIX kafla laga nr. 85 frá 23. júní 1936, um mál til ógildingar skjala o. fl. gilda ekki um skuldabréf samkvæmt reglugerð þessari.

10. gr.

Fjármunir þeir, sem inn koma fyrir sölu happdrættisskuldabréfanna, skulu renna til Vegasjóðs og skal þeim varið að $\frac{2}{3}$ hlutum til að greiða kostnað við gerð Norðurvegar milli Akureyrar og Reykjavíkur og að $\frac{1}{3}$ hluta til að greiða kostnað við gerð Austurvegar milli Reykjavíkur og Egilsstaða, um Suðurland, sbr. 7. gr. laga nr. 36/1975.

Kostnaður við framkvæmd þessarar fjáröflunar greiðist af söluandvirði skuldabréfanna.

11. gr.

Reglugerð þessi, sem sett er skv. 2. gr., sbr. 3. gr. laga nr. 7 frá 13. mars 1974, sbr. og 5. gr. laga nr. 36 frá 23. maí 1975, öðlast þegar gildi.

Fjármálaráðuneytið, 17. mars 1977.

Matthías Á. Mathiesen.

Jón Sigurðsson.